



Britt Harøy
Voksa 111
6089 SANDSHAMN

Saksbehandlar, innvalstelefon
Andreas Sandnes Granli, 71 25 84 27

Dispensasjon til felling av grågås på Voksa i Storevik dyrelivsfredningsområde

Britt Harøy får løyve til å gjennomføre skadereduserande tiltak som skremming og felling av skadegjerande gås på aktivt driven, nysådd innmark på Voksa. Løyvet gjeld for inntil 10 grågås i perioden 27.5 – 15.6-2022. Dette løyvet kjem i tillegg til vårt tidlegare vedtak og gjeld for året 2022. Statsforvaltaren definerer nysådd eng i denne samanheng som eng der det er sådd og første avling etter såing vert hausta i inneverande sesong.

Denne dispensasjonen gjeld i høve til vernereglane. De må i tillegg søkje kommunen om løyve til felling av skadegjerande grågås i medhald av viltlova.

Om søknaden

Britt Harøy søker om dispensasjon frå vernereglane for Storevik dyrelivsfredningsområde, for ulike skremmetiltak og skadefelling på grågås. Målet er å redusere årvisse beiteskadar og avlingstap på grunn av grågås.

Det er lang forhistorie med utfordringar knytt til grågås på Voksa. Fuglane kjem i flokkar og har eit aktivt næringssøk i ei tid på året der graset spirar og det er dårleg vekst. Resultatet er at gåsa beiter ned store areal og graset vert øydelagt. Søkar framhevar særleg utfordringar knytt til beiting på nysådd eng. Det er tidlegare gitt dispensasjon for skadefelling knytt til innmark på Voksa.

Rettsleg grunnlag

Søknaden er handsama etter Forskrift av 27. mai 1988 nr. 380 om vern av Storevik naturreservat med tilgrensande dyrelivsfreding, Sande kommune, Møre og Romsdal. Søknaden er også vurdert opp i mot vilkåra i nml § 48, 1. ledd, sjølv om § 48 ikkje er heimelsgrunnlag for vedtaket. Alle offentlege vedtak som vedkjem naturmangfald skal også vurderast etter nml §§ 8-12.

Formålet med vernet

Storevik naturreservat med tilgrensande dyrelivsfreding vart verna ved kongeleg resolusjon den 27. mai 1988. Formålet med fredinga er å ta vare på eit viktig våtmarksområde med tilhøyrande plantesamfunn, fugleliv og anna dyreliv.



For området med dyrelivsfreding er alle fugle- og pattedyrartar, også fuglereir, egg og ungar freda mot jakt og fangst, skade og øydelegging av alle slag. Fredingsføresegnene er ikkje til hinder for jakt på villmink, jf. kap. V nr. 8. Forvaltningsstyremakta kan etter kap. VI nr. 1 gje løyve til felling av vilt som gjer vesentleg skade, i samsvar med reglar og forskrifter i viltlova.

Vurdering

Storevik dyrelivsfredingsområde omfattar sjøområde og heile øya Voksa, Marøya, Flatøyna og Hestholmen, samt sjønære areal sør på Sandsøya og Sande kommune i tillegg til areal på Åram i Vanylven kommune. Det er variert dyre- og fugleliv, med eit mangfald av hekkande fugl, og rastande gjæser, ender, alke- og vadefugl. Både på Voksa og på Sandsøya opptre årkerrikse, som er vurdert som kritisk trua (CR) på Norsk rødliste for artar, jamfør registreringar i Artskart og Naturbase. Dei omsøkte tiltaka omfattar areal i område med dyrelivsfreding på Voksa. Det er ikkje aktuelt med tiltak i reservatet.

Det er store problem med skadebeiting av grågås på øya Voksa, som er omfatta av reglane for dyrelivsfreding rundt Storevik naturreservat. Statsforvaltaren har i den samanheng tidlegare gjeve dispensasjon frå vernereglane, for å redusere skadeomfanget.

Ikkje hekkande fuglar beiter gjerne i store flokkar og kan gjere stor skade på dyrkamark på våren før fjørskiftet og frå siste del av juli da dei kjem attende frå myteområda. Grågåsa går helst på ungt og spirande gras. I tillegg er det eit problem at graset blir trakka ned og forureina med ekskrement slik at det ikkje er eigna til dyrefor. Forbodet mot jakt avgrensar grunneigarane sitt høve til å skremme grågåsa vekk frå innmarka. Ulike skremmetiltak kombinert med felling av nokre fuglar vil ofte kunne gje ein god reduksjon i beiteskadane.

Det har vore vekst i grågåsbestanda dei seinare åra. Skremming og felling av nokre skadegjerande individ har ikkje avgjerande verknad på utviklinga i bestanden. Det er heller ikkje eit mål at felling i dette området skal regulere bestanden, men er tenkt å fungere som skremming. Ut frå det kunnskapsgrunnlaget vi har, finn Statsforvaltaren det forsvarleg å kunne gje løyve til skremming og felling av skadegjerande grågås i Storevik dyrelivsfredingsområde, jf. nml § 8. Det er i utgangspunktet ikkje ideelt å skyte grågås innafor eit dyrelivsfredingsområde i hekketida, da det kan forstyrre eller skremme andre hekkande artar i området. Ut frå føre-var-prinsippet, jf. § 9 i nml, vil vi ikkje gi dispensasjon for bruk av skytevåpen anna enn på aktivt driven dyrkamark. Grågås skal heller ikkje fellast om det er andre fugleartar i flokkane. Det må takast omsyn til eventuell førekomst av årkerrikse, og fellingsforsøk på dei aktuelle areala kan ikkje setjast i verk eller må avsluttast om det er årkerrikse på areala, då slik forstyrning er i strid med forvaltningsmålet for artar i nml § 5.

Det er mykje menneskeleg aktivitet og infrastruktur på den busette delen av øya. Dispensasjon for uttak av skadegjerande grågås vil ikkje utløyse ei totalbelastning som kunne bli skadeleg eller uheldig for grågåsbestanden eller fuglelivet elles, jf. nml § 12.

Konklusjon

Statsforvaltaren legg vekt på at løyvet til skremming og felling av skadegjerande grågås ikkje strir mot verneformålet eller påverkar verdiane nemneverdig, jf. nml § 48 første ledd, samt at løyvet vil kunne hjelpe grunneigar å få mindre beiteskadar på avlinga.

Vedtak

Britt Harøy får løyve til å skremme og felle grågås på nysådd aktivt driven innmark i Storevik dyrelivsfredingsområde i Sande kommune. Statsforvaltaren definerer nysådd eng i denne



samanheng som eng der det er sådd og første avling etter såing vert hausta i inneverande sesong. Dispensasjonen gjeld for felling av inntil 10 grågås i perioden 27.05.2022 – 15.06.2022.

Dispensasjonen vert gjeve i medhald av Forskrift av 27. mai 1988 nr. 380 om vern av Storevik naturreservat med tilgrensande dyrelivsfreding, Sande kommune kapittel VI nr. 1 på følgjande vilkår:

Spesielt for skadefelling:

1. Løyvet gjeld for skremming og felling av grågås på nysådd innmark i aktiv bruk, der det er påført beiteskade på eigedom.
2. Løyvet gjeld ikkje innafor Storevik naturreservat.
3. Løyvet til skadefelling gjeld i tida frå og med 27. mai til og med 15. juni 2022.
4. Det kan fellast inntil 10 grågås på Voksa i perioden 27. mai – 15. juni. Andre skremmetiltak skal vera forsøkt før gås vert felt.
5. Det kan fellast inntil 2 gjæser per dag.
6. Det skal ikkje fellast grågås når andre fugleartar oppheld seg i flokkane.
7. Det skal ikkje fellast eller skremmast grågås på areal der det er påvist åkerrikse og åkerrikse oppheld seg i sesongen. (Sjå www.artsobservasjonar.no for informasjon om førekomst av åkerrikse.)
8. Dersom det skal leggst ut felt gås som åte for havørn (skremmetiltak), kan det ikkje nyttast blyhagl ved felling av skadegjerande grågås.
9. Det skal takast bilete av buken på alle felte grågås på skadefelling. Bileta skal merkast med dato og fellingsstad. Bileta skal nyttast til forskning. Bileta saman med rapport om felte grågås skal sendast til Statsforvaltaren i Møre og Romsdal innan 1. september kvart år på epost: sfmrpost@statsforvalteren.no
10. Felling kan berre gjerast av grunneigar eller den grunneigar engasjerer til dette. Skadefelling er ikkje jakt, og skal ikkje leigast ut som dette.

Denne dispensasjonen gjeld for verneområdet. Du må i tillegg søkje kommunen om løyve til felling av skadegjerande grågås i medhald av viltlova. Kommunen skal vurdere omfang av skade og potensiale for skade før det vert gjeve løyve til felling av skadegjerande grågås.

Klagerett

Partane i saka eller andre med rettsleg klageinteresse kan klage på vedtaket innan tre veker frå det er mottatt. Klagen må vere grunngitt, og skal sendast til Statsforvaltaren. Miljødirektoratet avgjer klagen dersom Statsforvaltaren opprettheld vedtaket. Reglane om klage på vedtak går fram av kapittel VI i forvaltningslova.

Med helsing

Bjarne Otnes (e.f.)
fagleiar

Andreas Sandnes Granli
rådgivar

Dokumentet er elektronisk godkjent